

太上三皇寶齋神仙上錄經

三皇神仙內神寶祝齋錄門

黃帝曰凡學士精心願樂勤道求生苦齋大寂希求神仙朝夕求靈不避飢寒救護萬姓以為因緣福流七世免度大患身超水火形

安體全洞極上法令兆神仙學以成之道德日新

黃帝曰三皇神者胎靈之神也皇上之祕篇也兆有之者神仙見之者延年詠之者上見皇君十方諸天皆來試觀焉其文至妙其位至尊能令人出入水火變化幽冥司錄三官一時定生精勤之哉必書仙名其術至真非惟經篇

黃帝曰兆有此書勤心齋戒燒香祝文沐浴雲水燔烟上元結齋三九八帝神篇叩心祝誦上聞三天七世罪除具考都蠲過度苦道削罪成真勤而修之上見皇君矣

黃帝曰先天有三皇之神八帝次其治皆高真為輔邪惡不生災害不作非世所傳伏羲女媧之時也其治各一萬三千歲後上天為

八帝尊皇所受靈書妙術長生久化之道輔聖七錄治世三奇此其書也又以青素書三皇文三尺為幡以朱書之以一文竹竿懸於庭中亦可以几請皇文以北向為坐燒香願呪叩齒二十四道竟祝曰

香煙玉女上白皇君小兆甲乙清齋絕塵期靈五道上願成真滅禍生福上昇三天畢然燈行道祝願皆如此法也諸是災難禍害无不盡消疾病垂命皆得更生

又此齋法侍燈勤苦當日中一食至夜生氣時燒香陳願畢又一食此則每時食息也但不得冒履踏濁令不精專之人干犯齋禁也行事節度一如上法

合上元香珠法

用沉香三斤薰陸一斤青木九兩雞舌五兩玄參三兩雀頭六兩麝香三兩白芷二兩真檀四兩艾香三兩安息膠四兩木蘭三兩凡一十二種別擣細篩之畢納乾菓十兩更擣三萬杵納白器中密蓋蒸香一日畢更密和擣之丸如梧桐子以青繩穿之日曝令乾此

三皇真元之香珠也燒此皆徹九天真人玉女皆歌此於空玄之中又加雄黃半斤麝香四兩合擣和為丸服如大豆大十九日一服耳常能服之令人神明不衰口生香氣又感真徹靈降致玉女并萬病諸瘥惡鬼不祥妖魔皆自遠伏也

黃帝曰皇文齋法至真至貴非世所傳夫求長生及為萬兆請福救解厄難除災却害當先行八帝大齋之法以解七世父母及己身除罪三年之後乃得刻定仙名以致不死之道也若欲勅召百神皆須積齋成功感應自然乃可召之其時意中皆自了於心中也

黃帝曰若萬兆有疾病急厄及罪積深大不可得救者皆當告請三皇以為寶齋之法以拔贖之也當燒香然燈各三枚或五枚或七枚或九枚或可三十六枚以象三十六天之數也如此四十日或百日罪名皆除於是司命司錄以結定仙名為兆得無量大福明燈

以照神燔煙以嚮氣太真神樂三皇燕集兆得神仙慶派萬世一年之中得三七行事為

大度也

黃帝曰若為萬民致福救其急難厄禍兆當清齋三日若五日七日九日適意耳當沐浴玄雲之水燒皇上之香然玄液之燭三燈五燈七燈九燈意適耳相去間六尺不得令燭行大闕一香爐一油燈不得使人從燈間中過欲聽過五纂門又常守燈令香煙不絕至日中日入又再拜燒香祝乞適所陳耳此名五大齋內禮之法也

作香玄臑法

用麻臑一斛真檀一斤青木香一斤玄參一兩香珠三兩擣碎納臑中密蓋之微火煎之半日成也

作雲水之法

用水三斛青木香四兩真檀七兩玄參二兩合治煮之令得一沸畢清澄適寒溫以自沐浴也此天真玉女玄水之法名鍊胎神漿此法及香珠皆出於寶齋上錄篇中非世人之所見也
兆若欲知機通感知人罪福者皆應服三皇

幽天符即自通感神明遂見將來之玄會也

醮儀

候夜行道竟敷席設座依三皇位天皇北皂為座地皇西南白為座人皇東北碧為座三大長盤三甌酒昆布為脯南粽果隨時珍酒三斗省內脯

初向北呪曰

香煙玉女上白皇君某奉為某清齋行道十八時竟正爾燒香獻禮拜請三皇真君願降以靈元下入某身所啓運御三皇几前

次酌酒三拜跪曰

洞神弟子某謹為某奉請天皇監太一君地皇主真一君人皇統三一君願並降席鑒察丹心

次思神良久跪曰

小兆某上白三皇真君某以凡庸謬叨正法昔奉受三皇寶文內以自修外以教世今有某投詞披請謹重宣聞 讀詞謹承詞旨率同法如人奉為修建三皇齋直三日三夜一十八時行道竭誠首請事已周竟謹投蔬

醮薄獻蘋藻仰願聖皇特垂慈盼赦宥其深

愆重欲解釋冤對削落黑簡延益作曆療治眾疾水蒙康裕克隆萬福勤行德惠家國兼恭率土元吉謹以奏言請賜矜允再三拜

又隨意陳乞言曰

上降尊靈遠臨鄙渾祈禮既畢不敢稽留呼吸上昇還神反位稽首奉辭

次再拜燒香復爐曰

香煙三女真靈臨降垂慈布澤上昇天宮香煙飛散與道和合

次畢作禮而退

太上三皇寶齋神仙上錄經